

Wote Tutasimama Hukumuni,

Lakini wewe je! mbona wambukumu ndugu yako? Au wewe je! mbona wamdharau ndugu yako? Kwa maana sisi sote tutasimama mbele ya kiti cha hukumu cha Mungu. Warumi 14:10.

Tuko karibu na mwisho wa wakati. Majaribu kutoka nje yatakuja tele, lakini hebu na yasitoke ndani ya kanisa. Hebu watu wanaoitwa kwa jina la Mungu wajikane nafsi kwa ajili ya kweli na kwa ajili ya Kristo. “Kwa maana sisi sote tutasimama mbele ya kiti cha hukumu cha Mungu”... Kila mtu anayempenda Mungu atakuwa na roho ya Kristo na upendo mkubwa kwa mwenzake. Kadiri moyo wa mwanadamu unavyokuwa na ushirika na Mungu na kadiri upendo wake unavyojikita kwa Kristo, ndivyo kuvurugwa kwake na mikwaruzo na magumu ya maisha yanayompata kutakavyopungua. Wale wanaokuwa na kufikia utu uzima (wanamume na wanawake) katika Kristo Yesu, watazidi kufanana na Kristo kitabia, kuachana na tabia ya manung'uniko na kutoridhika. Watadharau kuwa watafuta makosa ya wengine.

Katika nyakati hizi kanisa linatakiwa kuwa na imani waliyokabidhiwa watakatifu mara moja, itakayowasaidia kusema kwa ujasiri: “Mungu ndiye anayenisaidia”; “Nayaweza mambo yote katika yeye anitiaye nguvu.” Bwana anatutaka kuamka na kusonga mbele. Mahali popote kanisa katika nyakati mbalimbali lilipoacha dhambi zao na kuamini na kutembea katika kweli, waliheshimiwa na Mungu. Katika imani na kutii kwa unyenyekevu kuna nguvu ambayo ulimwengu hauwezi kuihimili. Utaratibu wa majaaliwa ya Mungu katika uhusiano na watu Wake ni mwendelezo - kuzidi kusonga mbele katika ukamilishaji wa tabia ya Mkristo, katika njia ya utakatifu, kukua zaidi na zaidi katika nuru angavu na maarifa na upendo wa Mungu, hadi mwisho wa wakati. Je, ni kwa nini kila mara tunajifunza kanuni ya kwanza ya mafundisho ya Kristo pekee?

Bwana anazo baraka nyingi kwa ajili ya kanisa ikiwa waumini watatafuta kwa bidii kuamka kutoka katika hatari ya uvuguvugu. Dini ya ubatili, maneno yasiyo na uzima, tabia isiyo na nguvu ya kimaadili mambo haya yameoneshwa wazi katika ujumbe makini unaohubiriwa na Shahidi wa Kweli kwa makanisa, ukiwaonya juu ya majivuno, mambo ya ulimwengu, urasmi na kujitosheleza... Lakini kwa wale wanaojishusha, wanaojitaabisha, waaminifu, wastahimilivu, wale ambao wanafahamu udhaifu wao na kutojitosheleza kwao, wanapewa maneno ya kutia moyo: “Tazama, nasimama mlangoni, nabisha; mtu akiisikia sauti yangu na kuufungua mlango, nitaingia kwake, nami nitakula pamoja naye, na yeye pamoja nami”...

Bwana wetu anakawia kwa sababu Yeye “huvumilia kwenu, maana hapendi mtu yeyote apotee, bali wote wafikilie toba.” Lakini wakati sisi pamoja na wote waliokombolewa, tutakaposimama kando ya bahari ya kioo, tukiwa na vinubi vya dhahabu na taji za utukufu, na mbele yetu ukuu wa umilele, ndipo tutakapoonamna muda wa kusubiri ulivyokuwa mfupi. “Heri watumwa wale, ambao bwana wao ajapo atawakuta wanakesha” (Luka 12:37)

(Testimonies for the Church 5:483-485).